

D'ajébunaane mu Hádiho Alahane

Emisiyoŋo n'awusunane uyennennehin ni
Díino anéerne m'anfiyumne Yensa
Jerusalem Jamméejhinem. Angu dayrahu
m'anfiyumne Yensa Jerusalem ambocina
k'anrah a hádigenkinin k'anramun Díino.
Anfak andék a Jaameŋo Adénno k'ansali na
anramun Díino.

Jantenteŋ Gúloku Díino.

¹ Abári dam Piyer ingi Saŋ n'anŋay
hadéko anŋafah ba a Jaameŋo
Adénno ba salinjo waathu salifanaŋo.

² Banŋay hadéko andékum a
burukumbaano b'aretuhne
Burukumbaano Bújoonino andak
anlahun na údiigeeno mu hádiho
alahane. Agida, údiigeeno úmár

hádikinem alahalaha biriman
d'abosaane. Bísiba bísiba jamaŋo
gandokomne andék anninkem na
k'akiina sadaŋo imbi jamaŋo
m'andékehne a Jaameŋo Adénno.

³ Angu abárne dam Piyer ingi Saŋ
banŋay guŋano anlahuntam na
k'akiinaheeniŋ sadaŋo. ⁴ Bakiinay
nim Piyer ingi Saŋ annoorula
anwonn k'aningem, ki Piyer ayéjem:

- Ingah! Ningulo!

⁵ Piyer bayéjem nim údiigeeno
aningeeniŋ k'alah karo annékinem
sadaŋo. (Ñambúuñuraŋo 3:1-5)

Angu lentaarenŋ mara Piyer ingi Saŋ
ambokbok a ñantaalibehu Yensa haalaŋo
ingi inako. F'andékne a Jaameŋo Adénno

anlahun na a burukumbaano ukiinahu sada.
Úmár, biriman d'abosaane pirenden hadék
kanda f'akiinane sadaño Piyer alóblob ingi
úmár.

Piyer ayéjem:

- Ingah! Me lahári haani gukodi
úngonduk kanda ipiren íneero
sadaño n'eyikne. A gurethu Yensa
Ukáristo mu Nasaret, kenger k'údek!

⁷ Piyer balóbi anéerem silakánam
siyaaho k'akenginem. Fo Piyer
akanne nim hádiku údiigeeno ajéb
kañ. ⁸ Akeng jembiren k'akir
akumans hadéko atifeh Piyer ingi
San ba a Jaamenjo Adénno. K'angu
adékeh aricah kontaano k'aramunah

Díino f'andék anɲan a Jaameño
Adénno. (Ñambúuñuraño 3:6-8)

Angu údiigeeno asíibáásiib sadaño. Úmár
bakodiño gasíibane kanda Piyer
anéeremneer honj h'afanɲ bakodi n'ajóon.
Anéerem hádih hajébi. Ajébinem k'apiren
hadék. Akeng k'adék f'adék arica
n'akontane hadéko.

Úmár, biriman d'abosaane határanɲ hadéko.
Kanda inini apiren adék k'adék arica
k'aramun Díino dáde.

Lentaarenɲ mara biriman fam Yensa
anéneer ñantaalibeño haalaño ingi inako
sembe k'ampiren anjébun jamaño. Maɲ ni
Yensa ajébunne jamaño maɲ nim
ñambúuñuraño ampirene anjébun
jamaño a gurethu Yensa. Gúmár akanne

Piyer ayéj ukiinahu sadaño, «A gurethu Yensa Ukáristo mu Nasaret, kenger k'údek!» Angu Yensa ajébunne údiigeeno a gubaarhu Piyer.

Jantenteŋ Gúloku Díino.

⁹ Angu jamaño nip anningeh údiigeeno mu hádiho alahaherne n'adékehne angu aramunah Díino.

¹⁰ Anlentála údiigeeno m'anoohoherne a Burukumbaano Bújoonino k'akiinah sadaño. Alaaleeniŋ dáde k'abineeniŋ h'ayikemne.

¹¹ Angu Piyer ingi Saŋ banŋani a Jaameño Adénno andék a ránjáho r'ahuyuhne Ránjaku Sulemaani, andék anwonn na. Údiigeeno

m'ajébunaane anataheeniŋ na. Angu jamaŋo banfégi újebunaango angír ba gurahulinkinin maro abineeniŋ dáde ni údiigeeno ajébne. ¹² Angu Piyer bafégi n'angítehne awonn ayéj:

- Ninkinan, ii, jamankum mi Israyel, horaŋ gabinoonuŋne ni údiigeeno ajébinaane k'uningeheŋ mint? Karo ulaheŋlah karo ingi sembehint gikaanminne k'apiren hadék wola n'ilahminne binaahu Díino aliŋ gíjebunminne údiigeeno? Wówo! Hómáráŋ gireŋ! ¹³ K'ijellihinoonuŋ: Díino no maamaamankintor Ibrahiima ingi Siyaka ingi Yankuba anramunahne, nómár ajellihinoonuŋne gub bafuku úsokánom Yensa k'ajébun údiigeeno.

Kanda ninkinan, eke udooheṅdooh
Yensa k'údekuremeṅ a binaal imbi
ñanlaamekintor? Faka fo gúfánááro
m'aretuhne Pilat ayéjne ucaabeneṅ
k'asíiba búbennhu Yensa, ninkinan
ufoyoṅ k'ucucunomoṅ.
(Ñambúuñuraṅo 3:9-13)

Angu jamaṅo alaaleeniṅlaal dáde ni
údiigeeno ajébne. Biriman fam ganfékemfeg
n'anoone a burukumbanku Jaameṅo
Adénno bukiinahu sadaṅo. Kanda inini
gadékedek. Garicarica! Ganyéjeyej mara
Piyer ingi Saṅ anyikyik sembe n'anjébunne
údiigeeno úmár. Kanda Piyer ayéjeeniṅ
mara sembehu Yensa akanne ki údiigeeno
ajéb, k'adék ayéjeeniṅ, «Díino
ajellihinoonuṅne gub bafuku úsokánom
Yensa.» Angu Piyer atonṅ búteekinku

jamaŋo kúmbuuñaamo kúnsuuminno a
gubaarhu Yensa.

Piyer ayéj jamaŋo:

¹⁴ Féguroŋ! Dam ninkinan ufoyeŋfoy
búbennhu údiigeeno m'awúuhne
k'úduk ucaabeneŋ údiigeeno
m'abujumohne, mu jóndoŋne.

¹⁵ Ninkinan eke ukaaneŋkaan
k'ambuj údiigeeno m'anéerumehne
kanjébo. Kanda ingah! Díino
akenginem aŋoyintem a kanjébo. Te
mint íseediyamiŋseediya hómár.

¹⁶ Ingah! Údiigeeno ummu
m'úpájuleŋne mu hádiho
alahaherne, aji úfegen n'ajébne gub,
a baraku gurethu Yensa
gajébunaane. Guyroŋ a barakehint

gíjebunminne údiigeeno. A baraku
Yensa ingi gufiyunku gurethinem
gajébunaane kan a síghinan gub.

¹⁷ Ninkinan índoonenenkum ingi
indimaanankum, f'úyejeñne abujaa
Yensa, ninkinan ingi ñanlaamekánan
pájiiron h'okaaneñne. ¹⁸ H'ayikne
Umaasaño Mu Díino Acaabenne,
Díino alóblob gu bandór imbi
anabiyononjo. Biriman famiñi
ganyéjeyej maro jamaño
anyehenkineh úmár. Angu man
hómár arahne ingi h'okaaneñne
Umaasaño Mu Díino Acaabenne.

¹⁹ Inini, ninkinan, monon monon
añantay akúbul Jamméejhinem imbi
Díino k'anoolin a binaahánam, ki nim

akafari jínubonkánan.

(Ñambúuñuraajo 3:14-19)

Angu Piyer atéekintee kin jamanku
Jerusalem kúmbuuñaamo kúnsuuminno a
gubaaaru Yensa. Ayéjeeniŋ mara
anyúulenyuulen dáde n'anfoyne, n'ambujne
Yensa kanda Díino akengunemkengun a
biniironjo. Immerenŋ anséediyane mara
marigeno ajébjeb. Inini aññantay ankúbul
jamméejenkinin imbi Díino a gubaaaru
jínubonkánin k'anfiyum Yensa. Fam
anfoyfoy Yensa, kanda inini aññantay
anfiyumem k'antifilinem. Aji ankaani nim,
Díino akafarihineh jínubonkánin.

Immerenŋ anlahlah kara a binaahu Díino
gangune f'anfoyne, f'ambujne Yensa. A
waato inno, jamaŋo jup ganyéjeyej kara a

binaahu Díino gangune n'anfoyne Yensa.
Kanda Piyer ayéji mara nim girenj. Aji ufoyi
Yensa, guyro a binaahu Díino. Díino faño
abúuñurne Yensa. Yensa faño ingine
binaahu Díino. Angu Piyer ayéjeeniñ,
«Inini, ninkinan, moñon moñon añantay
akúbul Jamméejhinem imbi Díino k'anjoolin
a binaahánam, ki nim akafari
jínubonkánan.» Angu índukonjo
ankúbulkubul jamméejenkinin k'anfiyum
Yensa. Kanda índukonjo, ho Piyer alóbne
súumáreeniñ.

Jantentenj Gúloku Díino.

¹ F'anane balóbo índukonjo ampútor.
Alimaamaño, ulaameku
m'ammarahne Jaameño Adénno,
ñansaduseyaño, immerenj nip

ampútor. Anlahun na Piyer ingi San
n'anronj balóbo ingi jamaño. ² Angu
banlahunteeniḡ na immerenḡ
ñambúuñuraaño n'ankawandinehne
jamaño súumáreeniḡ. Ingi ka
ñambúuñuraaño anyéjne maro
Yensa akengunaakengun a biniironḡ,
na mees súumáreeniḡ haman hotir.
Fégeḡ baḡ, f'antéekinaane Yensa
akengkeng, na immerenḡ bujellihinku
jamaño maro uraagofonḡ m'aniirone
apirenpiren ajébunaa. Agida
immerenḡ ñansaduseyaḡo laháraḡaḡ
maro uraagofonḡ, aji aniirohi, apiren
aḡoolin ajéb. Kanda na súumuronḡ
alimaamaḡo ingi ñanlaameku
m'ammarahne Jaameḡo Adénno ingi
ñansaduseyaḡo immerenḡ nip. ³ Angu

andék anlah Piyer ingi Saŋ kanda ni
bísibaŋo aŋane guñuuno anyéj
ankimbeneeniŋ a kasoŋo baman
gucunkunom. Nim gankanne. ⁴ Kanda
haman nim m'anjantenne gúloku
Piyereŋ, ñanlabahi andómdom.
K'angu dam ñanraagofonjo
m'anfiyumne Yensa ambocinabocina.
Índiigeeno bareŋ m'antébné
ampútpuť anaman wuuliyeŋ
amákilan.

(Ñambúuñuraŋo 4:1-4)

Angu bísibaŋo bímár, jamaŋo juť
ankúbulkubul jamméejenkinin k'anfiyum
Yensa. Inini índiigeeno bareŋ m'anfiyumne
Yensa Jerusalem ambábár wuuliyeŋ
amákilan. Hoge Iblisa asúumemsuum ni

jamaño jup anfiyumne Yensa Jerusalem?
Wówo, súumurom haman hotir! Angu Iblisa
akankaan ki jamaño ankomb buyehenku
m'anfiyumne Yensa Jerusalem. Anlah Piyer
ingi Saṇ k'ankimbeneeniṇ a kasoṇo.

Jantenteṇ Gúloku Díino.

⁵ Afúrumi na, gucunkunom,
ñanlaameku alimaamaño ingi
ñanlaameku Ñanyahudo ingi
ñankeekihu Hañaañeno andak anrah
Jerusalem. ⁶ Immi tu andék anjóg na
ingi alimaamo adénno m'aretuhne
Ann. Jamanku Ann immerenṇ annuk
antóg na. Kayif ingi Saṇ ingi
Aleksandá ingi índukoṇo m'antohne
a bádinku Ann andak anjóg na.

⁷ Angu banjógi f'andék anlitinay nip

anhuy Piyer ingi Saṇ ingi údiigeeno
m'ajébunaane hádiho.

Anwonnálineeniṇ na a jannokánin
k'ammiih Piyer ingi Saṇ:

- Ninkinan, údiigeeno m'ajébunaane,
a sembe nooraṇ gajébunaane wola a
gurethu hantaṇ gajébunaane?

⁸ F'ammiiheeniṇne nim Piyer awaala.

Agida ni Jamméejhu Díino

Jarenninno arumun a hafithinem

k'anohálinkem. Ayéjeeniṇ:

- Ninkinan, ñanlaameku alimaamaṇo
ingi ñanlaameku jamanku Israyel,

⁹ karo úsiibáhaṇsiib

bukontkontinkum a hójooninno

h'ayikne gub imbi údiigeeno ummu

mu hádiho alahayerne ingi

n'akaanorumne fo ajéb? ¹⁰ Inini,
ísiibáásiib k'úpájálán, ninkinan ingi
jamanku Israyel índukoŋo nip maro
údiigeeno ummu m'ajébunaane ii a
gurethu Yensa Ukáristo mu Nasaret
gajébunaane. Agi úfegen n'ajébne,
gubaarhu sembehu wúuro mu
ufaanyuneŋne (a halihano) ki Díino
akenginem a biniironjo. ¹¹ Fégen baŋ,
a funaarenjo afúnnaafunn aññaañ a
Haññaañeno a nintiku ninkinan, ayéj:

*Buwaalo bu ñanlódo ancucunne,
maŋ buwaalo búmár adékirne aguy
b'afanyumne n'anafa a dígo.*

Nim ganñaañne bandór te buwaalo
búmár agune Yensa. ¹² Úpájulen, a
gurethu Yensa ba bareŋ wúuro

apirenkinehne apahun
ñankindenkinem. Díino nédenj úduk a
duniyaŋo nip m'apirenkinehne
apahun jamaŋo a kunyoku
jínubonkánin. (Ñambúuñuraŋo 4:5-
12)

Angu ñanlaameku Ñanyahudo anrah
k'ankaan tilibinaalo k'anhuyor Piyer ingi
Sanj. Lentaarenj mara fam, Piyer ingi Sanj
ambenuhbenuh ñanlaameku Ñanyahudo.
F'anlahne Yensa, immerenj angírgir
k'ankuba a gufacó k'ankimben habángááro.
Kanda inini, ni Díino anéereeniŋne
Jamméejhinem, immerenj ambollenbollen,
anyikyik sembe a jamméejenkinin k'anlób a
gubaarhu Yensa.

Angu Piyer, neeraŋ gayéjeeniŋne?

Ayéjeeniṅ, «Úpájuleṅ, a gurethu Yensa ba bareṅ wúuro apirenkinehne apahun ñankindenkinem. Díino nédeṅ úduk a duniyaṅo nip m'apirenkinehne apahun jamaṅo a kunyoku jínubonkánin.»

Angu ñanlaameku Ñanyahudo anfoyyoy Yensa kanda n'anfoyye Yensa anfoyyoy údiigeeno úmánduko mu Díino anéerne jamaṅo k'apahuneeniṅ a kuyoku jínubonkánin. Díino búuñuroṅ anabiyon adúk a duniyaṅo k'aniiro k'acaam jínubonku ñanraagofonjo. Yensa ba bareṅ gabúuñurne. Angu aji jamaṅo anfoyi Yensa, anfoyyoy údiigeeno úmánduko m'apireenne apahuneeniṅ.

Jamaṅo jup ganyéjeyej. «Me dakodi ingi Yensa. Síibiira k'iyennehin a gubaarhu

Yensa. Síibiira butifilinku binaahu Yensa.»
Nim ganyéjehne. Kanda uñantay
úteekineeniḡ ho Piyer atéekinne jamaḡo.
Uñantay úteekineeniḡ, «A gurethu Yensa
ba bareḡ wúuro apirenkinehne apahun
ñankindenkinem. Díino nédeḡ úduk a
duniyaḡo nip m'apirenkinehne apahun
jamaḡo a kunyoku jínubonkánin.»

Úpájuleḡ, Díino abúuñáribuuñ anabiyonḡoḡo
jup a duniyaḡo. Kanda Yensa bareḡ
gabúuñurne, biriman arjanna baman a
duniyaḡo k'aniiro iniman leeyaḡo k'acaam
jínubonkintor. Gúmár akanne Yensa ba
bareḡ apirenne apahun mintor a kuyoku
jínubonkintor. Aji ufoyi Yensa, ufoyfoy
binaalo bi Díino anéerne mintor k'apiren
akafari jínubonkintor.

Janteneŋ Gúloku Díino.

¹³ Angu, m'anjógne dam a tilibinaalo, Piyer balóbi hómár alaaleeniŋ dáde maro fo Piyer ingi Saŋ anjane balóbo náknákáránján. Anfak ankoros maro Piyer ingi Saŋ índiigeen mi karanjáranjan, gara andoohálinenoora. Ampápájul mees maro ingi Yensa gankokayehne.

¹⁴ Angu ñamhu tilibinaalo anfég údiigeeno m'ajébunaane n'awonnáne na, angu pájiireneŋ n'anyéjhinehne. ¹⁵ K'angu anfúnn Piyereŋ a bílido k'angu anlayayeŋ na, ¹⁶ anyéjayeh:

- Inini, mintoroŋ, neeraŋ gíndokhoŋne bukaano? Ingah!

Jamanku Jerusalem nip ampápájul
maro immi ankankaan h'alaalne
jamaño te hómár súumuron buñop.
Inini, k'inkaanoonun neerañ?

Anwecay jamméej tu k'ankir anyéj:

¹⁷ - Inini, intengaheeniñ k'anyohála
balóbo feren a gurethu Yensa ki nim
h'ayikne dayéega.

¹⁸ Angu banyéjay nim anpak
anhuyureeniñ. Bampútri anyéjeeniñ:

- Inini, ninkinan, inini, ubollahánañ
feren bukawandinku jamaño ingi
balóbo a gurethu Yensa.

(Ñambúuñuraño 4:13-18)

Úfegen, Piyer ingi Sañ aññantay ancaaben;
kara antifilin ho jamaño anlóbne, kara

antifilin ho Díino alóbne? Díino neeraŋ
gatéekineeniŋne? Ayéjeeniŋ k'andék benen
benen a duniyaŋo k'antéekin jamaŋo a
siyeŋo nip kúmbuuñaamo kúnsuuminno a
gubaarhu Yensa. Kanda ñanlaameku
Ñanyahudo anyéjeeniŋ, «Ninkinan, inini,
ubollahánaŋ fereŋ bukawandinku jamaŋo
ingi balóbo a gurethu Yensa.» Angu Piyer
ingi Saŋ neeraŋ ganñantane ankaan? Hóge
anñantay ambúuña ñanlaamekinin?

Ha, uñantay úbuuña ulaameken karo
bááhán, kara gúfánaáro. Kanda aji wúur
ayéji mara uñantay ukaan honj ho Díino
adíigumne, mbaŋ uñantay úbenn bukaano
ho Díino ayéjne, a waato nómar uñantay
úbuuña Díino buruhu k'úbuuña jamaŋo.
Haani bááhán, haani upáresidaŋo. Uñantay
úbuuña Díino. Gúmar akanne Piyer ingi Saŋ

anyéj ñanlaameku Ñanyahudo: «Ninkinan, iyennehinminyennehin h'ólobejne kanda, kuku ulekej balóbo a binaal. Hóge inini itifminj h'ólobejne, karo itifminj ho Díino alóbine?»

Angu, aji jamaño antéekinen mara ñantaaro ufium Yensa, ñantaaro utifilin binaahu Yensa. Aji anyéji nim, uñantay ucaaben, kara utif ho jamaño anlóbohne, kara utif ho Díino alóbine. Ha, k'intifonj ho Díino alóbine.

Jantentej Gúloku Díino.

²¹ Banlóbi nim jamanku tilibinaalo anfak antengaheeniñ k'angu ambénneeniñ k'andék. Ansíibáásiib buyohenkinin kanda fégirenej k'ampirenkinéh annéereeniñ

kayúuleno. Faka bollendenen maro
jamaño nip imme na buramunku
Díino a gubaarhu h'ayikne imbi
údiigeeno m'ajébunaane. ²² Úpájulen
tamaasero inno akaanaakaan imbi
údiigeeno m'ayikne díinen jamañinak
ingi honj.

²³ Angu dam Piyer ingi Sañ
bambénaa, andak anlahun
índinenkinin k'antéekineenin ho
ñanlaameku alimaamaño ingi
ñanlaamero anlóbne nip. ²⁴ Angu
ñanfiyunku Yensa ankomb gukiinahu
Díino, anyéjeh:

- Umuyhint, fi uyabne raafo ingi
réeño ingi jakaamaño ingi h'agune
na tu. ²⁵ Inini gunohálinne údoolhon

maamankint Dawuda k'alób. A
gubaarhu Jamméejhen Jarenninno
ayéj:

*Horan akanne ki akoorenejo,
anñuumuloh k'anjana na janf no
nafaaran?*

²⁶ Ingah! Ñammaasahu akoorenejo
amparepare ba biñaamo.

*Ñanlaameku duniyajo mees anjóg
ba buñaamálinku Umuyhintor
ingi Umaasajo M'acaabenne.*

Inini gunohálinne fam Umaasajo
Dawuda k'alób nim. ²⁷ Angu,
Umuyhint, ho Dawuda alóbne, man
hómár ayikne. Ífegminfeg maro dam
Umaasajo Herod ingi gúfánááro

Pontiyus Pilat ingi siyeŋo mi
guyroŋoŋne Ñanyahud ingi jamanku
Israyel immeren nip anyennehinay
nanka Jerusalem ba buñaamálinku
Údoolhon Urenninno, maŋ Yensa,
Umaasaŋo Mu fi Ucaabenne.

²⁸ Ankankaan maŋ ni fi úlobne
káriman fam. Hómár ayikyik a
gubaarhu sembehen maro hómár
gulahne káriman fam bukaano.

²⁹ Angu inini, Umuyhint, úfefeg
n'antengane mint. Inini, ikiinahomiŋ
k'úkááñin mint ñansókon k'ipirenmiŋ
ibollenmiŋ búteekinku índukoŋo
gúlokon. ³⁰ Inini, ukiinahaakiina
k'ujellihin jamaŋo bafukon. Kuku
újebun jamaŋo a gurethu Údoolhon
Urenninno Yensa. Ufak ukiinahaa

k'ukaan tamaasereño no
alaalhunehe jamaño.

³¹ Nim ñanfiyunku Yensa ankiinane
Díino dam. (Ñambúuñuraño 4:21-
31)

Angu fo ñanlaameku alimaamaño
antengane Piyer ingi Sañ ki daha anlób ingi
jamaño a gubaarhu Yensa.

F'antengaheeniñe k'ambéneeniñ, Piyer
ingi Sañ, neerañ gankanne? Anrah ingi
ídonkayhánin m'anfiyumne Yensa
k'anramun, k'ankiina Díino.

Angu aji jamaño antengahen k'anyéjo,
«Bént binaahu Yensa. Buku úlob ingi
jamaño a gubaarhu Yensa.» Aji jamaño
anyehenen iniman n'anyehunne Piyer ingi
Sañ, ukankáneh neerañ? Hoge úbenhineh

binaahu Yensa? Hoge ubollaháneh
búteekinku jamaño kúmbuuñaamo
kúnsuuminno a gubaarhu Yensa?
K'inkaanonj ho Piyer ingi Sanj ankanne.
K'inrahoj ingi m'anfiyumne Yensa
k'inramunonj Díino k'inkiinahonj Díino ki
Díino anéer mintor sembe. M'anfiyumne
Yensa Jerusalem anrahrach k'anyéj Díino,
«Umuyhint, fi uyabne raafon ingi réenjon ingi
jakaamano ingi h'agune na tu.» Angu nim
ginñantahonjne inkaanonj k'ínyejon Díino,
«Díino Bááhint n'agune arijanna, uyabyab
duniyano ingi júuno ingi bahúuro, yikirej
honj h'ópájul dupiren ukaan. Upiren umara
mint, Fi ufanj jamaño nip bayikhu sembe.»

Angu m'anfiyumne Yensa anfak anyéj
Díino, «Angu inini, Umuyhint, úfefeg
n'antengane mint. Inini, ikiinahominj

k'úkááñin mint ñansókon k'ipirenmin
ibollenmin búteekinku índukonjo gúlokon.»
Angu mintor mees fo inkiinahon Díino
k'íneyon Díino, «Kááñinti mint k'ibollenmin
búteekinku índukonjo gúlokon.» Aji
inkiinahon Díino, Díino akááñinkineh
mintor.

Angu Díino, neerañ gakanne a gúbidhu
m'anfiyumne Yensa Jerusalem?

Jantenteñ Gúloku Díino.

F'ambollane gukiinaño kantígo
k'anjógne tu ayindina. Faka
Jamméejhu Díino Jarenninno
aňanheeniñ f'arumun
k'anohálinkeeniñ. K'angu ñanfiyunku
Yensa ansunkurin búteekinku

duniyaŋo Gúloku Díino ni
deyundenen. (Ñambúuñuraŋo 4:31)

Angu, aji inkiinahonj Díino, afeero mara
Díino akááñinkineh mintor. Jamméejhu
Díino Jarenninno arumunkuneh hafitenku
moŋon moŋon m'afiyumne Yensa. Aji
marigeno, ufiyumfiyum Yensa, Yensa faŋo
anékuno sembe baman a hafithen k'upiren
ukaan ho Díino asíibane.